

Uunga siunnersuut: Nunami sumiiffinni immikkut toqqakkani takornariartitsinermik inuussutissarsiorinissamut akuersissuteqartarneq pillugu Inatsisartut inatsisaata nr. 19, 3. december 2012-imeersup allanngortinneqarnissaa pillugu Inatsisartut inatsisaat nr. xx, xx. Xxxx-imeersoq.

(Inuussutissarsiornermut, Suliffeqarnermut, Niuernermit Nunallu allanut Naalackersuisoq)

Siullermeerneqarnera

Aallaqqaasiullugu uku Partii Naleqqamiit pingaaruteqartutut erseqqissartariaqartutut isigaagut:

Takornariaqarneq – sukarsuit sisamaat, inuussutissarsiornermi ineriartortitsinermi? Imaluunnit Kaasarip atisartaavi? Kingullermut atatillugu tamanna eqqaaqqajaanarpoq, tassami kingumut qiviarutta ukiut 30-t tungaanut tamanna anguniarsimavarput aningaasallu miliaartit affaata tungaanut amerlatigisut atorsimallugit. Tamanna tunngaviusumik allallu nalilersortariaqarpagut, sualummik aningaasameeruttorneyup nalaani suna tamarmi siunertaminut naapertuunnersoq nalilersorlugu.

Tassanilu aamma immaqa allat issuaannarunnaarlugit uagut maani nunatsinni immikkut, nunatta immikkuullarissuunera, aamma kulturikkut, tunngavigalugu pilersaarusiuleraluarutta immaqa kiisami sukarsuit sisamaat ukiut 30-ngajaat anguniagaannaajunnaarluni sukarsuannagsagaluarpoq.

Taamatut aallarneriarluta uumap siunnersuutip immikkoortoq 90-ip siunertariniagaa Partii naleqqamiit oqaaseqarfigissavarput ima:

Siunnersuutip siunertaraa takornariaqarnermik inuussutissarsiorlut anguniagaqarnermini oqilisaaffigineqarnissaat. Taamaattorli aamma tusarniaanermi oqaaseqaatit kulturitsinnik tunngaveqarluinnartut maluginiarneqanngissinnaanngillat, tassami ICC-p KNAPK-llu maluginiaqquaa qangarsuaaniilli kalaallit piniariartaasiinik ileqqut innarlerneqannginnissaat, tamannalu soorunami aamma Partii Naleqqamut pingaaruteqarluinnarpoq, Naalackersuisunullu ugguuna uppersaqqussuarput tamaanga una inatsimmik allannguniarneq innarliissanngitsoq. Aammalu qulakkeeqqunarpoq aalisarnermik piniarnermillu inuussutissarsiorlut allannguniarneq akornusiissanngitsoq.

Taamaattumik KNAPK-p allannguutissamik siunnersuutaa Partii Naleqqamiit tamakkiisumik taperserparput oqaaseqaatit imaattut tunngavigalugit: ”Inatsimmi sumiiffinnut, kuunnut, imartaqarfinnullu qangaaniillit ullorlu manna tikillugu Kalaallit Nunaanni innuttaasunit atorneqarsimasunut sumiiffinnut akuersissuteqartoqarsinnaanngilaq.”

Aammattaaq iluatsillugu Partii Naleqqamiit paaserusupparput, soorlu aamma aalisarnermi inatsimmi massakut annertusiartuinnartumik nunatsinnut ajornartorsiutinngoriartortoq, tassalu ukiut marluinnaat nunami allamiut maaniissimagaangata akuersissutinik pisinnaanngortarnerata nalilersuiffigisariaqarnera. Ajornanngippallaarujussuaqaaq taamannak pisuussutitsinnik ”paggatsitsisarneq” sukaterisoqartariaqarporlu, kikkut allat kalaallit pisinnaatitaaffiisa mangiartorneqarneranik akersuunneq ilungersuutigissagamikku?

Per Rosing-Petersen